

**D**ies Exempel giebet eine wunder schöne Bedeutung / denn  
 Bethesda ist ein schönes Bilde der waren Kirchen Gottes / darin der  
 rechte Gnadenbrunne ist / ganz heylsam wider die Sünde. *Zach. 13.*  
 In welchem sich die Kranken Israeliten / nemlich alle Busfertige  
 Sünder waschen vnd baden. Der Engel der herab fehret vnd  
 das Wasser beweget / ist Christus Gottes vnd Marien Sohn / der  
 Engel des Bundes / *Malach. 3.* Der durch sein Wort vnd Geist das  
 Bad der Widergeburt in der heiligen Tauffe reget vnd beweget /  
 krefftig vnd heylsam machet. Derselbige ist auch der rechte Quas-  
 derstein / der nach seiner vierung / nemlich / nach Beschreibung der  
 vier Euangelisten / den vier orten der Welt bekant / verwand vnd  
 zugethan ist / vber den sich in der Tauffe im Jordan die Heilige  
 Dreyfaltigkeit gnediglich geoffenbaret hat / durch die Zal der Drey  
 Ellen bedeutet / vnd das ist der rechte Eckstein / welchen die Baw-  
 leute zu Jerusalem / die Hohenpriester / Phariseer vnd Schrifftge-  
 lerten vnd Obersten der Juden verworffen / vnd in das tieffe Was-  
 ser des ängstlichen Leydens vnd Sterbens gesenckt haben / dauon  
 das Wasser im Gnadenbrunnen hoch erhaben worden / das er ganz  
 vollläferig geworden / zu allen seiten gegen allen vier Orthen der  
 Welt miltig herauß geflossen / also / das alle die sich durch waren  
 Glauben an gemelten Eckstein halten / vnd sich auff seinen Namen  
 Teuffen lassen / von Sünden gewaschen / rechtschaffen heil / gesund  
 vnd selig werden / wie geschrieben stehet: *Marc. 16.* Wer da glau-  
 bet vnd getaufft wird / der wird selig werden / wer aber nicht glau-  
 bet / der wird verdampt werden.

Mehr Berichts von der Regula Cubica ist  
 in andern künstlichen Rechenbüchern  
 zu finden.

AREA